

ZAKON
O CENTRALNOJ BANCI
BOSNE I HERCEGOVINE

(" Službeni glasnik Bosne i Hercegovine", broj 1/97, 29/02, 8/03 13/03, 14/03, 76/06
i 32/07)

IZVOD

Centralna banka Bosne i Hercegovine je pravno lice sa punim ovlaštenjima i ima mogućnost da sklapa ugovore, nabavlja i raspolaže s pokretnom i nepokretnom imovinom. Sjedište Centralne banke je u Sarajevu, a ona osniva i održava centralni ured i glavne jedinice u Federaciji Bosne i Hercegovine i Republici Srpskoj. Ove glavne jedinice nemaju pravni status ili ovlaštenje koje su nezavisne od Centralne banke.

Upravno vijeće Centralne banke može uspostaviti predstavništva i urede za kontakte u inostranstvu i naimenovati zastupnike i korespodente.

Centralna banka i njene glavne jedinice imaju pečat koji uključuje i grbove, u skladu sa Zakonom o grbovima Bosne i Hercegovine. (član 1.)

U okviru svojih ovlaštenja utvrđenih ovim zakonom, Centralna banka je potpuno nezavisna od Federacije Bosne i Hercegovine, Republike Srpske, te bilo koje javne agencije i organa, a u cilju objektivnog sprovođenja svojih zadataka, osim ako nije drugačije određeno zakonom. (član 3.)

Centralna banka zastupa Bosnu i Hercegovinu na svim međuvladinim sastancima, tijelima i organizacijama, sudjeluje u međunarodnim organizacijama kroz međunarodnu monetarnu saradnju, pruža bankarske usluge u korist stranih vlada, stranih centralnih banaka i monetarnih vlasti, preuzima odgovornost i vrši transakcije u vezi sa sudjelovanjem Bosne i Hercegovine u međunarodnim organizacijama. (član 4.)

U poglavlju II regulisana je organizacija i administracija Centralne banke, u poglavlju III finansijski propisi, a u poglavlju IV monetarna funkcija i djelatnost Centralne banke.

U poglavlju V utvrđena je monetarna jedinica, novčanice i kovani novac. Monetarna jedinica Bosne i Hercegovine je "Konvertibilna marka", koja se dijeli na stotinu "Feninga", čiji su simboli "KM", odnosno "F". Konvertibilnu marku izdaje Centralna banka i stavlja u cirkulaciju preko svoje centrale i glavnih jedinica.

Konvertibilna marka ja zakonito sredstvo plaćanja svih javnih i privatnih obaveza i dugova u Bosni i Hercegovini. Sve javne institucije i privatna lica ili preduzeća moraju prihvatiti Konvertibilnu marku u poravnanju i plaćanju bilo kojih obaveza prema njima.

Za plaćanja u i plaćanja iz budžeta i zajedničkih institucija BiH , te na zvaničnim računima zajedničkih institucija BiH koristi se samo Konvertibilna marka.

Budžet i zvanični računi javnih institucija Federacije BiH i Republike Srpske, kao i tarife, takse i druga plaćanja na račun javnih službi ili službi javnog prevoza se izražavaju u Konvertibilnim markama. Pored toga, u ove svrhe se mogu koristiti druge valute kao obračunske jedinice.

Nadležni organi Federacije BiH i Republike Srpske treba da preduzmu sve napore da podstaknu upotrebu konvertibilne marke o čemu će Predsjedništvo BiH svaka tri mjeseca , nakon dostavljene analize Monetarnog fonda, sagledati uložene napore za upotrebu Konvertibilne marke.

Plaćanja u transakcijama između fizičkih lica, privatnih preduzeća i mješovitih preduzeća se vrše u valuti o kojoj se strane u transakciji dogovore, uključujući strane valute koje su u širokoj upotrebi u Federaciji BiH i Republici Srpskoj na dan stupanja na snagu ovog zakona. (član 38.)

Upravno vijeće Centralne banke je jedini autoritet u Bosni i Hercegovini koje donosi odluke o izdavanju zakonitog sredstva plaćanja , preko centrale, glavnih jedinica i ostalih filijala u Federaciji BiH i Republici Srpskoj.

Upravno vijeće Centralne banke određuje nominalnu vrijednost i veličinu novčanica i kovanica. O dizajnu novčanica i kovanica odlučuje Upravo vijeće uz odobrenje Predsjedništva Bosne i Hercegovine. (član 39. i 42.)

Poglavljima VI, VII, VIII, IX i X je regulisana politika deviznog kursa, deviznih rezervi i devizne kontrole, odnosi Centralne banke sa drugim javnim institucijama, odnosima Centralne banke s bankama, računi, finansijski izvodi, revizija i izvještaji centralne banke i različiti propisi.

Upravno vijeće Centralne banke se konsultuje o svim zakonskim prijedlozima vezano za sva pitanja koja se odnose na njeno poslovanje, ili koja su u domenu njene nadležnosti prije nego budu dostavljena zakonodavnom tijelu Bosne i Hercegovine, Federacije Bosne i Hercegovine i Republike Srpske.

-Ovaj zakon stupa na snagu osmog dana po njegovom usvajanju od strane Parlamentarne skupštine Bosne i Hercegovine.

-Zakon je objavljen u "Službenom glasniku BiH", broj 1/97, dana 29. oktobra 1997. godine.

Zadnje izmjene i dopune ovog zakona objavljene su u "Službenom glasniku BiH", broj 32/07, od 30. aprila 2007. godine.